

GNOVE LEÇ ELETORÂL

di FELICIANO MEDEOT

Je passade juste cualchi setemane di cuant che inte Cjamare dai Deputâts taliane al è sucedût chel grant davoi su la votazion pe gnove leç eletorâl che si à vût sintût su ducj i giornâi e telegjornâi.

Come cualchidun al à fat justementri notâ, al è il câs di ricuardâ che l'acuardi su la leç eletorâl al è saltât propit suntun articul indulà che a jerin proviodudis normis di pueste pal Trentin e pal Tiròl di misdi pe elezion dai parlamentârs di chês dôs provinciis autonomis: in sumis, si voleve tirâ vie la norme pensade par tutelâ la rapresentance de comunitât lenghistiche todesce.

Chest nus fâs pensâ a cetant che il Stât talian al à in-mò di cjapâ at dal test de Costituzione dal 1948: se a son normis di pueste pe tutele des minorancis lenghistichis, sedi chês nazionâls (come la todesce, la slovene e la francese) o lis comunitâts regionâls (come chê furlane e sarde che a son lis plui numerosis e, di fat, a son maiorançe in Friûl e in Sardegna), a àn di jessi normis di pueste ancje pe elezion dai lôr rapresentants tal Parlament. No je une cuistion di tutele legâl o ben di ricognossiment internazionâl, e je une cuistion di principi!

Al è interessant tornâ a viodi cemût che il concet di tutele e rapresentance tal Parlament nol è stât considerât te storie de Republiche Taliane, in particolâr pal Friûl e pe nestre Region.

Il test unic su lis leçs pe elezion de Cjamare dal 1957 al divideve il teritori dal stât talian in circoscrizions: di chestis, la XI e cjapave dentri lis provinciis di Gurize, Udin (e dopo ancje Pordenon) e chê di Belum; la XXXII dute la provincie di Triest. Il sisteme di ripartizion dai seçs al jere proporzionâl cu la pussibilitât pal eletôr di esprimi preferencis.

Po cu la stagion dai referendum tai prins agns Novante dal secul passât (si ricuardais des batais di Mario Segni?) tal 1993 il sisteme al jere cambiât e si jere introdusût, sei ta la Cjamare che tal Senât, un sisteme coerent, cu la leç proponude di Sergio Mattarella: pe Cjama-



La Cjamare dai Deputâts te discussion falade de gnove leç eletorâl

La identitât dai territoris e va simpri garantide

La storie de Republiche e regjistre tancj ribaltions di coleçs e circoscrizions Impuartance des minorancis linguistichis, sei nazionâls sei regionâls

re, la Region e je stade metude adun intune uniche circoscrizion IX "Friuli Venezia Giulia", cun 10 elets in coleçs indulà che al passave il plui votât e 3 elets cul sisteme proporzionâl.

In tims plui resints, o sin tal 2006, altri "ribalton" des leçs e si torne a un sisteme proporzionâl pe Cjamare, ma cence la pussibilitât di esprimi preferencis: un sisteme che al è stât nomenât "porcellum" (cun dut il rispjet par chê puare bestie).

La plui resinte, clamade "Italicum", e je dal 2015 che e sdrume la nestre region in doi coleçs ch'a metin dongje un Triest cun Gurize, dute la Basse furlane, Cividât e po sù fin a Tarvis; chel altri ce ch' al reste de Provincie di Udin

cun dute la Provincie di Pordenon (po cualchidun al varès ancje di spiegâns ce che a àn in comun Tarvis cun Monfalcon o Mugle cun Prisinins). Ancje se e je stade in part çonçjate de Cort Costituzionâl, il sisteme dai doi coleçs al è in-mò in vore.

E je vere che il sisteme eletorâl al varès di garantî sei la rapresentativitât di diviersis ideis e propuestis politichis e ancje la governabilitât dal Stât, ma al varès ancje di di garantî la rapresentance dai territoris e des particolaritâts (soredut lenghistichis) presintis su chel teritori.

Pal stes resonament, la presince de minorance slovene tal Parlament e à di jessi garantide par principi daûr di regulis definidis e no su la

fonde di un acuardi jenfri i rapresentants de minorance e un partît.

Si à di ricuardâ che il numar di deputâts mandâts a Rome dal Friûl e di Triest al è talment piçul (13 su di un totâl di 630 deputâts) che nol pues dal sigûr meti in dubit la guverniabilitât dal Stât. E il stes resonament al vâl ancje pes altris circoscrizions indulà che a son presintis minorancis lenghistichis.

A son passâts juste 70 agns de aprovazion da la specialitât de nestre Region (che e cole juste ai 27 di Jugn) e de Costituzione de Republiche taliane, ma il Parlament nol à in-mò normât la rapresentance di pueste di chescj territoris. No saressie ancje ore?

©RIPRODUZIONE RISERVATA



Il pari de autonomie furlane Tiziano Tessitori

AUTONOMIE SPECIÂL

A 70 agns dal vôt su la Region Friûl Vj

di GIUSEPPE MARIUZ

A colin juscj setante agns dal vôt de Assemblee Costituente, che te sentade plenarie dal 27 di Jugn dal 1947 e decidè di istituî la Region cun autonomie speciâl Friûl - Vignesie Julie. Su la sort istituzionâl dal Friûl, di diviers mès si discuteve te Sot-Comission "dai 75" de Costituente, otri che te societât e tai organizims economics e culturâi a nivel locâl, cun diviers ponts di viste. A contavin soredut resons di caratar politic, stant la sort malcierte di Triest e dai confins cu la Jugoslavia, e di caratar teritoriâl, par vie che Pordenon e voleve stâ unide cul Venit mentri che Gurize e temeve une supremazie di Udin che e veve inglobât la sò provincie dal 1923 al 1927.

Il pari de Region al pues jessi considerât Tiziano Tessitori che, poiât de Associazion furlane pe autonomie, dal MPF (Moviment populâr furlan) e de stes Filologjiche, al veve proponût une Region Furlane, doventade cun compromès politic a la Costituente "Friuli - Venezia Giulia". La cuistion e jere doventade spinose dopo che Togliatti, cambiant la posizion iniziâl contrarie dal Pci, si veve declarât favorevul par l'autonomie speciâl, jessint la Region "plurilingue", ven a stâi cun minorance slovene.

Si à di savê difat che nissun in chê volte (al di fûr dal periodic Patrie dal Friûl di pre Josef Marchet) al rivendicave un pari dirit lenghistic dal furlan (che semai al jere considerât un dialet impuartant pe latinitât dal teritori).

Duncje, la poie dai comunisj a une Region Friûl - Vignesie Ju-

lie a statût speciâl e jere intindude come un plasê fat a lis prete-sis de Jugoslavia e de Union sovietiche. Di chi, dute une cressinte oposizion no dome dai partîts nazionalisj, ma ancje de part moderade de Democrazie cristiane, di republicans, liberâi, azionisj e parfin socialisj.

Cussì, il vôt a largje maiorançe dal 27 di Jugn a l'Assemblee Costituente si jere trasformât intun boomerang a nivel locâl. A Udin si revoltarin cuinti l'autonomie speciâl (ma a pro di chê ordenarie) otri che diviers giornâi (soredut Il Lunedì e il Messaggero Veneto), l'Ordin dai avvocats, dai comercialisj, l'Associazion agrarie, l'Automobil club, l'Associazion dai industriâi, dai comerciantis, dai artesans, l'Associazion "Combattenti e reduci", il sindacât dai insegnants, diviersis cooperativis e cussì vie. A Gurize si regjistrave une proteste in-mò plui fuarte viers il plurilinguism (escludint Pci e associazions slovenis), mentri che il Consei comunâl di Pordenon al rilancave una grande Region Venit di Rovigo a Gurize.

Tessitori al restà isolât, siben che la sò posizion e difendès un principi costituzionâl e che al ves precisât che no jere in discussion la lealtà da lis popolazions de Region viers l'Italie.

Stant che la decision e jere stade cjapade ai 27 di Jugn, te riunione de Costituente ai 30 di Otubar un politic navigât come Giovanni Gronchi al tirà fûr la propueste di sospenzion dal statût speciâl di cheste Region, che e fo metude te X norme transitorie. Si rivarà a la Region Friûl - Vignesie Julie dome tal 1963.

©RIPRODUZIONE RISERVATA

ART DAL NÛFCENT

I animâi te piture di Luigi Zuccheri



Luigi Zuccheri (Glemone 1904-Vignesie 1974) al fo un pitôr dome in aparince figuratîf, ancje parcè che nol rispjetave la prospetive fra i animâi e il lôr habitat. I critics lu definirin "classic e felis". Inte foto, un particolâr dal so "Martin pescatore" (g.e.).

NONS DI LÛC

Lis vieris originis pandudis di Scjaramont

di Ermanno Dentesano

Cualchi studiôs plui savint di nô al à vût dit che il non di Castelraimondo (Forgjarie) al diven di chel dal patriarcje che lu à tirât sù ae fin dal Dusinte, ven a stâi Raimondo della Torre; il non, cun di fat, al comparis pe prime volte intal 1291.

Un di chescj studiôs al disè ancje che la forme furlane e je une etimologjie populâr di chê taliane, là che la int e à

voltât Castel in Scjà e Rai-mondo in Ra-mont. Nuie di plui falât: al è vèr il contrari, oben che Castelraimondo al è una paretimologjie di Scjaramont e lu pandarî miôr in altrò.

Par cumò al covente di nome che Scjaramont al è un non une vore vieris, cun origjins che a van indaûr fintremai ai Celts e forsit in-mò plui in là. Tant par scomençâ Scjar al diven di cjar, come Carso/Scjars, cu la zonte di une

S- (es. cancelâ/scancelâ, Fleons/Sfleons, Casso/Scjas, Chiusa(forte)/Scluse e vie indevant).

Baste pensâ che tacât di Scjaramont o cjatîn propite un Scjars. Podopo -mont par antic al jere dal sigûr -mon, là che par poiâsi ben a àn zon-tât une -t.

O vês di savê che "mon" e je une particule cetant viere, che e vignive doprade par formâ nons di lûc e di altri fatis. In Friûl si cjatin une vore

di toponims che a àn dentri cheste particule e o nomenin nome cualchidun: Pisimoni, Enemonç, Esemont, Tramonç, Dimon, Premon, Tarcimont e vie indenant.

O sai che no crodês masse a cheste robe, par vie che fin in di di vuê us àn contât masse sflocjis su chescj nons. Fat al è che culû no vin masse puest e duncje o varin di spiegâ in altrò ancje cheste cuistion.

©RIPRODUZIONE RISERVATA